
یوہ آکا شوانی جموں ہے محمد آصف لو دھی تیں خبر سنو۔

LG Terrorism

دہشت گردان نانہ ٹھکانو مہیا کران آلاں نانہ خبردار کرتاں واں لیفٹنٹ گو رنر منوج سنہا نے سختی نال کہیو ہے جے معصوم لوکاں نانہ نشانو بنان آلا دہشت گردان نانہ کدیں وی معاف نہیں کیو جائے گو۔ اُن نے کہیو جے حفاظتی دستاں، سول انتظامیہ تے جموں کشمیر غا لوکاں نانہ دہشت گردی غے خلاف اک جُٹ ہون غی لوڑ ہے تانجے دہشت گردی نانہ جڑ تیں پٹ غے باہر پھینکیو جا سکے۔ جناب سنہا جاتے روز وادی کشمیر غا با رہمولہ ضلع مانہ ”سیو یوتھ، سیو فیو چر“ نامی اک غیر سرکار تنظیم غی طرفوں منعقدہ رابطہ عوام پروگرام غے دوران خطاب کر رہیا تھا۔ مُلک غی تعمیر و ترقی مانہ نوجوانان غی شمولیت نانہ ضروری قرار دیتاں واں لیفٹنٹ گو رنر نے کہیو جے جموں کشمیر غا نوجوانان نانہ اس ویلے مچ ساری للکاراں غو سامنو ہے جس مانہ جموں کشمیر نانہ نشہ تیں پاک بنان غو کم ساراں نال مورے ہے۔ جس خاطر ہم ساراں نانہ ڈٹ غے مقابلو کرنو وے گو۔ اُنہاں نے کہیو جے وزیر اعظم نریندر مودی غی سربراہی آلی حکومت جموں کشمیر غا نوجوانان غی آساں اُمید اں نانہ پو رو کرن واسطے ہر ممکن کوشش کر رہی ہے۔

JK Assembly Day 2

جموں کشمیر اسمبلی اجلاس غے دوجے تہارے وزیراعلیٰ عمر عبداللہ نے کو ئے 57 اسمبلی ممبران سمیت سابق وزیر اعظم آنجہانی اٹل بہاری واجپائی نانہ جموں کشمیر مانہ امن بحال کرن گا سلسلہ مانہ زبردست خراج عقیدت پیش کیو ہے۔ اسمبلی اجلاس غے دوران بولتاں واں وزیر اعلیٰ عمر عبداللہ نے کہیو جے کدیں اٹل بہاری واجپائی غا دسیہ وی رستا ور چلتا تاں اج جموں کشمیر غی موجودہ صورتحال گچھ الگ ہوتی۔ سابق وزیر اعظم غی طرفوں جمہوریت، انسانیت تے کشمیریت غا نعرہ نانہ دُبعاتاں واں جناب عبداللہ نے کہیو جے اٹل بہاری واجپائی نے ہر ویلے دوستی غو ہتھ اگے بدھا غے امن تے خوشحالی غی وکالت کی ہے۔

Terrorist Killed

شمالی کشمیر غا بانڈی پورہ ضلع مانہ حفاظتی دستاں تے دہشت گردان بشکار جاری تصادم مانہ اک دہشت گرد نانہ ہلاک کر دتو گیو ہے۔ اس سلسلہ مانہ فوج غی چنار کور غا ترجمان نے جانکاری دتی ہے جے بانڈی پورہ ضلع غا کیپٹن علاقہ مانہ تلاشی کاروائی غے دوران فوج نے ایکن دہشت گرد نانہ مار مکایو ہے۔ فوجی ترجمان نے مزید تفصیلات دیتاں واں دسیو ہے جے فوج نے گئی رات علاقہ مانہ دہشت گردان غی موجودگی بارے اک سول لگن تیں بعد علاقہ غی کھیرا بندی کر غے تلاشی کاروائی شروع کی تھی جس دوران اُت چھپا وا دہشت گردان

نے فوج ور گولی چلانی شروع کر دی۔ جس تیں بعد تصادم شروع ہو گئیو۔ آخری خبر ملن توڑی تصادم جا ری تھو تے مزید تفصیلات غی اجوں اڑیک ہے۔

Winter Session

پا رلیمنٹ غو سرمائی اجلاس آئندہ 25 نومبر تیں شروع ہو رہیو ہے۔ جہیڑو 20 دسمبر توڑی جا ری رہ گئیو۔ اس سلسلہ مانہ پا رلیمانی معاملات غا وزیر کرن رچی جو نے سماجی میڈیا ور اک پوسٹ سانجا کرتاں واں جانکا ری دتی ہے جے آئندہ 26 نومبر نانہ بھارتی آئین نانہ اپنایا جان غی 75 وی برسی منائی جا ئے گی۔ جس خاطر سمویدان سدھن غا مرکزی حال مانہ اک خصوصی تقریب منعقد وے گی۔

CS Ayushman

چیف سیکریٹری اتل ڈلو نے صحت تے طبی تعلیم محکمہ ور زور دیتاں واں ہدایت کی ہے جے دسمبر مہینہ غا اخیر توڑی آیوشمان بھارت سکیم غے تحت لوکاں نانہ صحت بیمہ غی سہولیات مہیا کران غے متعلق تمام تر بقایا معاملات نانہ نمپڑ لیو جا ئے۔ اس سلسلہ مانہ اک جائزہ میٹنگ غے دوران صحت محکمہ غا عہدیداراں نے جناب ڈلو نانہ جانکاری دیتاں واں دسیو ہے جے اس سال غا ما رچ مہینہ تیں بٹن توڑی صحت بیمہ غے متعلق 2 لکھ 65 ہزار معاملات نانہ پہلاں ہی تیں منظوری دتی جا چکی ہے۔ جد کہ 2 لکھ 51 ہزار 4 سو 87 معاملہ رقومات غی آدائیگی واسطے ٹوریا گیا ہیں۔ میٹنگ غے دوران بولتاں واں صحت تے طبی تعلیم محکمہ غا سیکریٹری ڈاکٹر سید عابد رشید شاہ نے دسیو ہے جے آیوشمان بھارت سکیم غے تحت محکمہ غی طرفوں ریڈ غی ہڈی جیسا دوجا جسمانی حصاں غا آپریشن نانہ ترجیح دتی جا ئے گی۔

CJ Samba

جموں کشمیر تے لداخ عدالت عالیہ غا چیف جسٹس ناشی ریستان نے جا تے روز ضلع عدالتی کمپلیکس سانہ غو دورو لا غے عدالتی کم کاج غو تفصیلی جائزو لیو۔ اپنا دورہ غے دوران چیف جسٹس نے عدالت غاتعمیراتی کم غا سلسلہ مانہ متعلقہ ایجنسیاں نانہ ہدائیت کی ہیں جے تمام تر ترقیاتی پروجیکٹاں نانہ مٹھی وی مدت غے اندر مکمل کیو جائے۔ نالے پروجیکٹ غی خاطر مٹھی گئی تخمینہ لا گت تیں متو خرچو نہ کیو جا ئے۔ اس دوران چیف جسٹس نے سماجی بھلائی بہتری با رے محکمہ غی طرفوں شناخت کیا گیا جسمانی طور آدمانو لوکاں مانہ سکوتر وی تقسیم کیا۔
